

15 di october ta Dia Internacional di e garoti blanco

ORANJESTAD — Mañan dia 15 di october ta dia internacional di e garoti blanco. Abo conoce e garoti blanco? Un garoti blanco ta un medio auxilia pa un persona cu tin un limitacion di bista of un persona cu ta ciego. Un persona visualmente incapaz ta uza e medio auxilia aki, e garoti, pa 2 motibo importante:




1. Pa hala atencion di otro peaton y esunnan participante na trafico, cu e persona en cuestion ta mira malo of no ta mira mes. Ta uza e garoti di guia specialmente ora di crusa caya, pero ta uza esaki tambe pa cana mas comodo caminda tin trafico di hopi hende.



CON UN USUARIO DI E GAROTI BLANCO TA INDICA CU E KIER CRUSA ?

E usuario di e garoti ta indica cu e kier crusa dor di hisa su garoti stret su dilanti, ora e yega na e zebrapad of caminda cu e ta bay crusa. Despues e ta scucha si e auto a stop y den aproximadamente 2 seconde e ta cuminsa na crusa e caminda. Ora cu e yega meymey di e caminda e ta baha e garoti y ta fula pa e trottoir. Ora e automobilista mira un persona cu ta bay crusa cu su garoti, e no tin mester di grita, of pita e auto, pero simplemente para y warda pa 2 seconde.

Na FAVI e terapeuta di re-



validacion ta e persona indica pa duna e persona ciego y e persona cu bista limita e instruccion den e canamento cu garoti. E terapeuta ta duna instruccion den e vecindario cu e cliente conoce y tambe na luganan desconoci pa e cliente. Despues cu e cliente ta domina e canamento cu e garoti e ta bay ariba caminda publico cu esaki. E cliente ta siña uza su oido bon y ta siña interpreta kico ta pariba, pabao, crusa caminda etc.

Na Aruba sin embargo hopi cliente tin miedo di haci uzo di careteranan. Un di e motibonan principal di esaki ta cu nos infraestructura no ta adapta na hendenan cu limitacion visual. Por ehempel: e trottoirnan na Aruba hopi


biaha ta kibra, yerba ta crece riba nan, of nos no tin trottoir mes. Nan mester di bon trottoir pa sinti nan mes sigur. E automobilista no tin e pasenshi pa warda un rato pa duna e uzado chens pa crusa caminda. Nos a ripara cu na Aruba tur hende tin pura y ta core hopi duro.

FAVI ta compronde e miedo di su clientenan pa cana riba caya y pa esaki ta haci un suplica na comunidad pa tene cuenta cu esaki.

FAVI lo keda conscientisa nos comunidad y keda stimula nos clientenan pa haci uzo di e garoti blanco riba caya y tambe den nan ambiente social. Laga nos tur cuminsa respeta e persona cu e garoti di guia. □

E fundacion FAVI a introduci su website oficial y e video promocional

ORANJESTAD — Recientemente a introduccion oficial di e website completamente renoba y e video di informacion di FAVI. Fundacion FAVI tin ya algun aña trahando ariba e PR plan, e plan di promocion di e fundacion. E proyecto aki a cuminsa na 2009 cu e ex director sra. Mieke de Droog. Na 2011 e director nobo sra. Baarh a continua e proyecto sumamente importante aki cu ta yegando su terminacion



Durante di e mainta di introduccion e presidente di FAVI sra. Joy Duinker-Barry presidente di FAVI a habri e mainta gradiciendo prensa pa su presencia. Despues sra. Baarh directora di FAVI a sigui dunando un corto splicacion tocante di e proyecto PR, na unda cu el a splica cu e meta principal ta pa duna mas informacion cu ta posibel na diferente grupo di meta y tambe yega mas cerca di e persona cu mester di e ayudo di FAVI. A cuminsa na traha borchinan di foam cu a wordo poni den e gang nan di FAVI pa asina aki e diferente bishitantenan por lesa informacion di e servicionan di FAVI. Despues a sigui cu e proceso largo di traha foyeto yena cu informacion valioso. Den total a traha 8 diferente foyeto.

Foyeto general, muchanan 0-6 aña, mucha/hoben 7-19 aña, adultonan 20+, medianan auxilia, informacion pa esun cu ta referi un persona na FAVI, y foyeto cu informacion pa maestro di scol y doño di trabao. E foyetonan ta den idioma, Papiamentu, Hulandes y Ingles.

FAVI a traha su website renoba y tur foyeto lo ta accesibel tambe via di e website nobo. E website di FAVI ta accesibel tambe pa personanan cu tin limitacion di bista. E lo bay tin e posibilidad di aumento y zonido. Tambe ta importante pa menciona cu e website tin e colornan geel cu preto cu ta e colornan cu ta duna bon contraste na momento di lesa. Na 2012 FAVI a habri su Facebook account tambe pa brinda mucho mas informacion. Pa completa e proyecto FAVI a cumpra diferente medio auxilia y a traha un maleta di informacion pa uza durante di informacion na comunidad.

Asina aki tambe e website di FAVI a wordo lansa y un splicacion a wordo duna dor di Sary Wernet-Kelly. Despues prensa hunto cu algun invitado a haya e prome



oportunidad pa mira e video promocional di FAVI. FAVI ta gradici Samenwerkende

Fondsen di Hulanda y CEDE Aruba cu a financia e proyecto aki. □